

Headlines

1. प्रधानमंत्री नरेन्द्र मोदी होरें आखेआ ऐ जे 2025–26 ब'रे दा केन्द्री बजट भारत दी तरक्की लेई महत्वपूर्ण बदलाव आह्नेने आह्ला होग ते एह् 140 करोड़ देशवासियें दिएं आसैं—तांगें गी पूरा करने दी सरकार दी वचनबद्धता गी दर्शादा ऐ।
2. केन्द्र शासित प्रदेश जम्मू–कश्मीर लेई केन्द्री बजट च 41 ज्हार करोड़ रपे दी तजवीज कीती गई ऐ। जम्मू–कश्मीर पुलस लेई बक्खरे तौर उपपर 9 ज्हार 325 करोड़ रपे रक्खे गे न।
3. उपमुख्यमंत्री सुरिंदर चौधरी होरें आखेआ ऐ जे उमर अब्दुल्ला हुंदी अगुवाई आह्ली सरकार जम्मू–कश्मीर दे पूरे–पराते विकास लेई वचनबद्ध ऐ।
4. जम्मू–कश्मीर सरकारै अपने मलाजमें लेई उंदी संपत्तिएं मतल्लक सलाना रिटर्न, पीआरएस पोर्टल पर जमा करोआने दी खीरी तरीक बधाइयै 15 फरवरी 2025 करी दित्ती ऐ।

<><><><><><>

PM-Budget

प्रधानमंत्री नरेन्द्र मोदी वित्त मंत्री निर्मला सीतारमण हुंदे आस्सेआ कल लोकसभा च पेश कीते गेदे केन्द्रीय बजट दी सराहना कीती। उनें आखेआ जे एह् बजट भारत दी प्रगति च महत्वपूर्ण साबत होग। उनें आखेआ जे एह् बजट विकसित भारत दी यात्रा गी रफ्तार देने च बी भूमका नभाग। उनें आखेआ जे केन्द्रीय बजट नमिएं काह्डें, उद्यमियता ते बक्ख–बक्ख सेक्टरें जियां आर्टिफिशल इंटेलीजेंस, खडोने, राई–बाई, खाद्य प्रसंस्करण बगैरा च टिकारु विकास जकीनी करोग।

<><><><><><>

JK Budget

केन्द्र सरकारै अगले माली ब'रे 2025–26 दे बजट केन्द्र शासित प्रदेश जम्मू कश्मीर लेई 41 ज्हार करोड़ 7 लक्ख रपे दा प्रस्ताह् रक्खेआ ऐ। इस प्रस्तावित राशि थमां 40 ज्हार 619 करोड़ 3. लक्ख रपे संसाधने दी वित्थ गी पूरने लेई जम्मू कश्मीर गी केन्द्रीय सहायता दे तौर पर दित्ते जाने लेई रक्खे गे न। बजट सरबंधी दस्तावेज मूजब 2 सौ 79 करोड़ रपे आपदा प्रतिक्रिया कोष लेई ते इक सौ इक करोड़ 71 लक्ख रपे ढांचागत परियोजनाएं लेई दित्ते गे न। एह्दे अलावा केन्द्र सरकार नै 9 ज्हार 325 करोड़ रपे जम्मू कश्मीर पुलस लेई अलाट कीते न। बजट तैहत पुलस बल दे पूंजीगत खर्च लेई राशि दित्ती गई ऐ। 8 ज्हार 897 करोड़ 72 लक्ख रपे रोजमर्रा दे खर्चें लेई ते 4 सौ 28 करोड़ ते इक लक्ख रपे महत्वपूर्ण परियोजनाएं लेई रक्खे गे न।

<><><><><><>

LG-People Reaction

उपराज्यपाल मनोज सिन्हा होरें मध्यम वर्ग गी राहत पजाने ते पूरे पराते विकास लेई दलेरी आले फ़ैसले आले बजट 2025 दी सराहना कीती ऐ। उनें वित मंत्री निर्मला सीतारमण हुंदी विकसित भारत लेई इक व्यवहारिक बजट पेश करने लेई सराहना कीती। उनें गरीब, युवा, करसानें ते महिलाएं दे विकास लेई कीते गेदे जतनें दी सराहना कीती। जम्मू कश्मीर दे लोकें इस बजट गी मध्यम वर्गख रोजगार, ढांचागत विकास, निर्यात ते सैलसफा पर आधारित करार दित्ता ।

<><><><><><>

Annoncement

केन्द्री बजट 2025-26 बारे आकाशवाणी दा क्षेत्रीय समाचार एकांश जम्मू अज्ज ऐतवारें इक विशेष परिचर्चा प्रसारत करोग। 45एं मिंटे दा एह परिचर्चा कल रातीं 8 बजे साढ़े प्राइमरी चैनल पर प्रसारित कीती जाग जेहड़ा तुस मीडियम वेव 303 मीटर यानि 990 किलोहर्ट्स एफएम 100.3 मैगाहर्ट्स ते ओआरएम 981 किलोहर्ट्स पर सुनदे हो। इस परिचर्चा च समाज दे बक्ख-बक्ख वर्ग कन्नै तालुक रखने आले माहिर बजट दे बक्ख-बक्ख पैहलुएं पर चर्चा करगन। श्रोताओ जेकर तुंदे मने च बजट गी लेइयै कोई सोआल जा शैंका ऐ ते तुस चांहदे ओ जे ओ सोआल अस माहिरें कोला पुच्छे, तां अपना सोआल तुस साढ़े ई-मेल rnujammu@gmail.com पर लिखियै भेजी सकदे ओ।

<><><><><><>

LG Meet

अंतर्राष्ट्रीय टेनिस खडारी रोहन बोपन्ना होरें उपराज्यपाल मनोज सिन्हा हुंदे कन्नै राजभवन च मलाटी कीती। बोपन्ना होरें बैंगलुरु स्थित उंदी टेनिस अकादमी च जम्मू कश्मीर दे युवाएं गी सिखलाई देंने ते उंदे हुनर गी होर तराशने सरबन्धी जतनें गी उजागर कीता। उपराज्यपाल होरें बोपन्ना हुंदे जतनें दी सराहना कीती। उपराज्यपाल होरें अंतर्राष्ट्रीय खो खो खडारी नाजिया बिबी कन्नै मलाटी कीती। एह खडारी भारतीय महिला खो खो विश्व कप विजेता टीम दा हिस्सा ही। नाजिया बिबी होर नगरोटा दियां रौहने आलियां न। उपराज्यपाल होरें नाजिया होरें गी उंदी उपलब्धि लेई मुबारक बाद दित्ती ते भविक्ख दिएं प्रतियोगिताएं लेई शुभकामनां दित्तियां।

<><><><><><>

Dy CM

उपमुख्यमंत्री सुरिंदर चौधरी होरें आखेआ ऐ जे ओमर अब्दुल्ला हुंदी अगुवाई आहली सरकार जम्मू-कश्मीर दे पूरे-पराते विकास लेई वचनबद्ध ऐ। उनें आखेआ जे प्रदेश च छड़े प्रोत्साहनें आस्तै गै उद्योग स्थापित नेई कीते जाडन सगुआं इंदा मकसद मुकामी लोकें लेई रोजगार पैदा करना होना लोडचदा ऐ। उनें इब्बी जकीन दोआया जे गैर-कनूनी तौरा पर खान्नां कड्डने आहलें, नशा तस्करें ते गैर-कनूनी गतिविधिएं च मुलव्वस लोकें खलाफ सख्त कार्रवाई कीती जाहग। सुरिंदर चौधरी होरें गलाया जे सरकारै समाज दे सब्बनें तबकें लेई तरक्की ते कम्में च पारदर्शिता जकीनी बनाने दा पक्का धेइया कीते दा ऐ।

<><><><><><>

CS

मुख्य सचिव अटल डुल्लु होरें आखेआ ऐ जे सरकार बेरोजगारी दी समस्या गी खत्म करने ते जम्मू-कश्मीर दे माली ढांचे गी तगड़ा बनाने लेई होर मते युनिटें दी स्थापना लेई वचनबद्ध ऐ। एह गल्ल उनें नमें विकसित कीते गेदे बगथाली औद्योगिक एस्टेट दा दौरा लांदे होई आखी। इस मौके पर उनें उत्थे जारी कम्में दा निरीक्षण कीता। मीडिया कन्ने गल्लबात करदे होई मुख्य सचिव होरें दस्सेआ जे खित्ते लेई 28 ज्हार 400 करोड़ रुपें दे औद्योगिक पैकेज दा ऐलान कीता गेदा ऐ।

<><><><><><>

PRS Deadline

जम्मू-कश्मीर सरकार नै अपने मलाजमें लेई उंदी संपत्तिएं मतल्लक सलाना रिटर्न पीआरएस पोर्टल उप्पर जमा करोआने दी खीरी तरीक बधाइयै 15 फरवरी 2025 करी दित्ती ऐ। पैहले एह समें-सीमा 31 जनवरी तगर दी रक्खी गेदी ही पर केई सारे मुलाजम, इस समें-सीमा दे अंदर एह रिटर्न जमा नेई करोआई सके जेहदे चलदे इसी बधाने दा फैसला लैता गेआ ऐ। सरकारै इब्बी आखेआ इस हुक्मै दी पालमा नेई करने ते तय समें-सीमा दे अंदर-अंदर एह रिटर्न जमा नेई करोआने आहलें खलाफ कार्रवाई कीती जाहग जेहदे च भ्रष्टाचार दी रोकथाम सरबन्धी कानून तैहत जुर्माने लाना ते विजिलेंस क्लियरेंस नेई दित्ता जाना बी शामिल होग। ओकड़े मुलाजम, जिनें गी अपनी संपत्तिएं मतल्लक सलाना रिटर्न भरने च कोई बी दिक्कत पेश औंदी ऐ उनें गी एह सलाह दित्ती गई ऐ जे ओह अपने संपर्क ब्यौरें गी अपडेट करन ते अधिकारिक ईमेल support-prs@jk.gov.in उप्पर संपर्क करियै मदाद हासल करन।

<><><><><><>

Didi Ki Rasoi

दीनदयाल अत्योदय योजना राष्ट्री शैहरी आजीविका मिशन दे तैहत उधमपुर दियां डिप्टी कमीशनर सलोनी राय होरें सरकारी डिग्री कालेज च “दीदी की रसोई” कैटीन दा उद्घाटन कीता। जेहदे च सस्ती कीमतें च घरै च बने खाने पीने आलियां चीजां थ्हांगन ते जिसी महिलाएं दे आप सहायता आस्सेआ चलाया जा’रदा ऐ। इस पैहलकदमी दा मकसद राष्ट्रीय शैहरी आजीविका मिशन तैहत महिलाएं ते आप सहायता समूहें दी कारोबारी गतिविधिएं गी प्रोत्साहित करना ते कालेज दे विद्यार्थि, कर्मचारि, ते कलेज दे अमले गी सस्ती ते पौष्टिक रूट्टी उपलब्ध करोआना ते सेहत गी बढ़ावा देना ऐ।

<><><><><><>